

योएल

ब्रेक्ब मुर: योएल आ नें आ अर्थ “परमप्रभु यावे, परमप्रभु बाक्ब” देंशो बाक्ब। मेको आ आफ पेथुएल आ पर्बम मारेइ मतुंडसीब। योएलम यहूदा राज्यमी परमप्रभु आ लोव्र पशो बाक्त।

गेना ब्रेक्शो: मुर काम अथाल्याहम आंम कली पिपीम सेल्सेनु, पिप आ तौ योआश चढेब येहो-यादाम परमप्रभु आ खिंम खुइशशा वोइशशो ना, ८०० बि. सी.म खोदेशो एको किताब ब्रेक्शो बाक्ब, दे मिम्नीम।

मार ब्रेक्शो: मालेपुकीमी इस्राएल रागी कली निक्शी खेयप रागी नेल्ल खतम सेल्लेक्म। रेउ मयितीके परमप्रभु यावे आ गेशो सजाइ बाक्त। मोपतीके योएलम मुर आन कली परमप्रभु यावे गे लेतीन। परमप्रभु यावेम आ गे लेशशो मुर आन कली माफ गेब। योएल २:१३ आन साम्शो नेल्ल लेप्ब। योएल २:२५ योएलमी “इस्राएली ला ममाइ, अर्को रागी डा मुरपुकीमी यो, परमप्रभु यावे आ श्येत रे प्रोंइशो तने चाप्नीम” देंशो बाक्ब।

सल्लाहा मालेमी श्येत गेशो

1 परमप्रभु यावेमी पेथुएल आ तौ योएल कली देंशो लोव्र एको बाक्ब।

2 मिनु मेको लोव्र मार बाक्त देंशा हना “गे खाल्पापुकी, एको लोव्र नेनीन। रागीम बाक्ब मुर नेल्ल इन नोफा दाइशशा नेनीन। मार, इन ब्रोंइतीक नाक्ती नु इन किकी पिपी आन ब्रोंइतीक नाक्तीम ओदेंशो दुम्शो बाक्मे?”

3 गे एको लोव्र इन तमी तौ आन कली देनीन। मिनु इन तमी तौपुकीमी आन तमी तौ आन कली देंपतीन। मिनु मेकोपुकीमी आन चच युइ आन कली देंमल।

4 घांस खोइशशा ब्वाइब मालेपुकीमी मार मार प्रोन्मे, मेको लेस्वा मालेपुकीमी नेक्तेक्म। मिनु लेस्वा मालेपुकीमी मार मार प्रोन्मे, मेको तोडले मालेपुकीमी नेक्तेक्म। मिनु तोडले मालेपुकीमी मार मार प्रोन्मे, मेको सल्हा मालेपुकीमी नेक्तेक्म। योएल २:२५

5 मिनु गे दुक्शा बाक्बपुकी सेंसीशा, डाक्कीन। मिनु अडगुर शांबु तूशा दुक्ब नेल्ल नक अडगुर शांबु आ पर्बम रोंका पने। मारदे हना मेको इन शोव रे रोंडसीशो बाक्ब।

6 ठेयब रागी डा मुरपुकी आं रागीम ओव्रतेक्म। मेको सक्ति पाइशशो नु हिकने मचाप्चा डा पा शुश बाक्नीम। मेको आ खुइ गुप्स आन खुइ खोदेशो बाक्नीम। मिनु मेको आन लाइशशो खुइ, छाउरी गुप्स आ खुइ खोदेशो बाक्नीम। योएल २:२

7 मेकोपुकीमी आं अडगुर रू खतम पोक्शा, आं फोव्रशी रवा नेल्ल तिम्शा चेततेक्म। मेकोपुकीमी मेको आन कोक्ते नेल्ल थुरशा, ताइक्ताक्म। मेको आन राशी नेल्ल बुश दुम्तेक्म।

8 मिनु कन्ने मीश आलमी अरन्डी फेक्शा, आ ग्युंबे पचशो वोंइश आल आ पर्बम दोपा रोंका पाइबा, मोपा रोंका पने।

9 अन्न चढेतीके नु तूचा थोव्रक चढेतीके परमप्रभु यावे आ खिंमी चढेचा देक्शो बाक्ब। परमप्रभु यावे आ डोंइती गेय पाइब चढेबपुकी रोंका पाइनीम। योएल २:१४

10 मिनु रू नेल्ल श्येतथ दुम्शो बाक्नीम। खप रोंका पाइब। मारदे हना अन्न नेल्ल खतम दुम्शो बाक्ब। अडगुर आ रस सोव्रत। तेल रवा आन फल सोव्रतेक्म।

11 गे रूम गेय पाइबपुकी सुर्ता पने। अडगुर खुम्बपुकी रोंका पने। क्योव्रज चेरब आ पर्बम यो रोंका पने। मारदे हना बाली नाली खतम दुम्शो बाक्नीम।

12 अडगुर बोट सोल सुल बेक्तेक्म। फोव्रशी रवा यो सोव्रतेक्म। अनार, खजूर, स्याउ रवा नु रू डा रवा नेल्ल सोव्रतेक्म। थमा पा, मुर आन दातेमी मुर आन ग्येरतीक थुं यो मेको खोदेशो पा नुप्शो

बाकब।

13 चढेबपुकी, सुर्ता पा अरन्डी फेक्शा रोंका पने। चढेतीकेमी गेय पाइबपुकी रोंका पने। आं परमप्रभु आ गेय पाइबपुकी, नाकदो यो सुर्ता पा अरन्डी फेक्शा बाक्कीन। मारदे हना इन परमप्रभु आ खिंमी अन्न चढेतीके नु तूचा थोव्रक चढेतीके देक्शो बाकब।

14 मिनु माइजा बाक्चा कली मुर आन कली खुप्तीन। परमप्रभु यावे आ खिंम रागीम बाक्ब मुर नेल्ल बुक्शा, खाल्पा आन कली ब्रेत्तीन। गे खाल्पा नु मुर आन कली परमप्रभु यावे, इन परमप्रभु आ खिंम पुक्कीन। मिनु परमप्रभु यावे कली ठेयब सेंदा पा ‘वारच पाइक्की’ दे पुनीन” देंत। भजन संग्रह १०४:१०,११; योएल २:१५

योएलमी रोंका पशो

15 मिनु योएलमी “परमप्रभु यावे आ जाक्चा चिक्शो नाक्त आ पर्बम आबी आबी, मारदे हना मुल मेको नाक्त जाक्ब। नेल्ल क्येडा सक्ति पाइश्शो खतम पोक्तीके जाक्ब। योएल २:१; यसैया १३:६

16 मार, इं जचा थोव्रक इं डोंइती रे मरोइक्से डा? मार, ग्येरशा सोम्शा बाक्तीके आंइ परमप्रभु आ खिं रे मयोल्म डा? ब्यवस्था १६:३१

17 वांचेर नेल्ल खप आगाम सोव्रशा रोम्शा लीतेक्म। अन्न वोइक्तीक खिं ब्रेशो बाक्नीम। अन्न वोइक्तीक श्येतथ दुम्तेक्म। मारदे हना अन्न मदुम।

18 मिनु बस्तु भाव रोंका पाइनीमी। बी ब्यफ जोतीक मबाक्तीके हिरना हिरन बाक्नीम। क्यारश भेडा आन हुल यो श्येत जशो बाक्नीम।

19 परमप्रभु यावे, गो इन कली वाइ ब्रेशशा थोइनुड। मारदे हना बी ब्यफ नु क्यारश भेडा आन जोतीके मीम नेक्शो बाक्ब। मिनु मीम रू डा रवा नेल्ल नेक्शो बाक्ब। योएल २:३

20 मिनु ब्वाकी डा जन्तुपुकीमी यो इन कली थोशो बाक्नीम। मारदे हना खोला सोव्रशो बाक्नीम। मिनु मीम गोरशो रागी डा बस्तु

भाव योव्रतीक डा घांस नेल्ल नेक्शो बाक्ब” देंत। भजन संग्रह १०४:१०-११

2

परमप्रभुम निसाफ पचा चिक्शो

1 सियोनमी तुराही ताप्पीन। आं डांडामी शुश ग्रीब ताप्तीक ग्रोव्र ताप्पीन। रागीम बाक्ब मुर नेल्ल गिक गिक पा खिंखि पामेक्ल। मारदे हना परमप्रभु यावे आ जाक्शो नाक्त नेक्था जाक्शो बाक्ब। मेको जाक्चा चिक्शो बाक्ब। योएल १:१५

2 मेको नाक्ती छिडछिड नु हिंचा डा बाक्ब। मेको थम ठेयब गोस्स नु छिडछिडमी सुम्शो बाक्ब। मिनु ठेयब सक्ति पाइश्शो लडाइ पाइब आन हुलमी डांडा आन कली क्येर गोस्सुम सुम्शो खोदेशो पा सुम्शो बाक्नीम। मेको मोदेशो डोंइती गेनायो मदुम्शो बाक्त। मिनु नोले डा मुर आन पालाम यो मोदेशो गेनायो मदुम्ब। योएल १:६; प्रस्थान १०:१३-१५

3 मेको आन डोंइडोंइती मीम मारेइ मारेइ नेक्ब। मिनु मेको आन नोनोले मी ब्राइब। मेको आन डोंइती रूपुकी एदेन डा फल फुल रू खोदेशो बाक्नीम। मेको आन नोले गोरशो रागी खोदेशो दुम्नीम। मेकोपुकी रे मारेइ मब्रोंइनीम। योएल १:१९

4 मेको आन कुल शारा आन कुल खोदेशो बाक्नीम। लडाइ पाइब शारा डोइक्ब खोदेशो पा बारनीम।

5 मेकोपुकी बग्गी दोरशो रेयके खोदेशो पा पहाड तार दोरनीम। मीम आइक्च शी दाक्शो खोदेशो पा रेयके पाइनीम। मेकोपुकी सक्ति पाइश्शो लडाइ पाइब आन हुलमी लडाइ पचा चिक्शो खोदेशो बाक्नीम।

6 मिनु जात जात डा मुर मेको आन कली तशा हिंशा, आन कुल राव किक्पाइक्नीम।

7 मेकोपुकी लडाइ पाइबपुकी खोदेशो पा बारशा, गारो डोंइसीनीम। मेको का का पा आन गाक्शो लां मप्रोंइथु, आन लांम गाक्नीम।

8 मेकोपुकी मचुमुथु गाक्शा, लां का खोइक्नीम। मिनु या कुरशो आन जोरी सत्रु आन हुलम ओव्रनीम। मिनु सुइमी मेको आन कली तेक्ने मचाप्नीम।

9 मेकोपुकी सहर कली लडाइ तोचा कली गारो तार दोरनीम। मेकोपुकी खिं डा झेल रे खुइ खोदेशो पा ओव्रनीम।

10 मिनु मेको आन डोंइती रागीम खिनु कुइब। सरीड हिम्सीब। नां नु तास्ला छिडछिड दुम्नीस। मिनु सोरुलमी आन हाम्सो मकोंइनीम। योएल ३:४; यसैया १३:१०

11 मिनु परमप्रभु यावे आ लडाइ पाइब आन डोंइती ठेयब सेंदा पा लोव्र पाइब। मेको आ लडाइ पाइब सक्ति पाइशो नु शुश बाक्नीम। मिनु मेको आ देशो टीब हिक्ने मचाप्चा डा बाक्नीम। परमप्रभु यावे आ निसाफ पतीक नाक्ती ठेयब नु थम हिंचा डा बाक्ब। मेको सुम फाल्ने चाप्नीमी डा?

परमप्रभुमी “आं गे लेतीन” देशो

12 परमप्रभु यावेमी “इन थुं नेल्लेमी आं गे लेतीन। गे माइजा बाक्शा, डाक्शा नु रोंका पा आं गे लेतीन। इजीकीएल ३३:११

13 गे रोंका पा इन वा मखाक्कीन। इन थुं खाक्कीन। गेपुकी परमप्रभु यावे, इन परमप्रभु गे लेतीन। मारदे हना मेकोमी शिशी पा दाक्ब। मेको रीब पा मगाइक्ब। गेना हना यो दाक्ब नु रीब पा सजाइ मगेब बाक्ब। प्रस्थान ३४:६

14 मिनु परमप्रभु यावेमी आ थुं लेशशा, सजाइ मगेथु, आसीक गेबा कों? मेको सुम तुइक्बा डा? मिनु गेपुकीम परमप्रभु यावे, इन परमप्रभु कली अन्न चढ़ेतीक नु तूचा थोव्रक चढ़ेतीके चढ़ेने। योना ३:९

15 सियोनमी तुराही ताप्पीन। माइजा बाक्चा कली मुर आन कली खुप्तीन। मिनु चाड मानेचा कली मुर आन कली ब्रेत्तीन। योएल १:१४

16 मुर नेल्ल आन कली खुप्तीन। बुक्शो मुर नेल्ल आन कली परमप्रभु यावे आ डोंइती ठीक सेलीन। खाल्पा आन कली खुप्तीन। आल आन कली खुप्तीन। दूध तूब आल आन कली यो खुप्तीन। ग्युम्ले आ कोठा रे गूल। मिनु ग्युम्ली आ बाक्तीक रे जाक्ल।

17 परमप्रभु यावे आ डोंइती गेय पाइब चढेबपुकी परमप्रभु यावे आ खिं डा पिंडी नु चढेतीक आ दातेम डाक्मल” देंत। मेकोपुकीमी “परमप्रभु यावे इन मुर आन कली सजाइ मगेने। रागी रागी डा मुर आन डोंइती इन मुर आन कली शुक्शी नु तोक्शा लोत्र पाइक्तीक दुम्चा मगेने। मिनु जात जात डा मुरपुकीमी ‘मार, मेको आन परमप्रभु ते बाक्म?’ देंचा मतामेक्ल” देंतेक्म। भजन संग्रह ७९:१०

परमप्रभुमी लोत्र लेशो

18 मिनु परमप्रभु यावेमी आ रागी आ पबर्म रुश पा, आ मुर आन कली शिशी पाप्तु।

19 मिनु परमप्रभु यावेमी आ मुर आन कली मिम्शा “गो इन कली अन्न, अडगुर शांबु नु तेल सोइक्नन्नी। मिनु गे रूनीनी। मिनु गो इन कली रागी रागी डा मुर आन दातेमी गेनायो शुक्शी पाइक्तीक दुम्चा मगेनन्नी। योएल २६:२७

20 गो उत्तर रे जाक्शो लडाइ पाइब आन कली इन क्येडा डोन खेरनुडमी। गो मेको आन कली कोक्त। मुल गोरशो रागीमी खेरनुडमी। मेको आन डोंइती डा हुल आन कली पूब डा समुन्द्र गे नु मेको आन नोले डा हुल आन कली पच्छिम डा समुन्द्र गे खेरनुडमी। मिनु मेको आन राक्शो रिना इर गे लाइब” दे परमप्रभुमी देंत। मेकोमी थमा पा ठेयब गेय पशो बाक्ब।

21 रागी डा मुर महिनीन। गे ग्येरशा सोम्सीशा बाक्कीन। परमप्रभु यावेमी ठेयब गेय पशो बाक्ब।

22 गे ब्वाकी डा जन्तु महिनीन। मारदे हना गोरशो रागी डा योव्रतीक गिगी दुम्शो बाक्ब। रवाम फल सित्नीम। फोव्रशी रवा नु अडगुर आ बोटमी शुश फल सित्नीम।

23 गे सियोन डा मुरपुकी ग्येरसीन। गेपुकी परमप्रभु यावे, इन परमप्रभु आ पब्रम शुश ग्येरसीन। मारदे हना मेकोमी आ ठीक पतीकेम इन कली डोंइती डा रेउ गेशो बाक्त। मेकोमी इन कली शुश रेउ गेशो बाक्त। डोंइती नु नोले डा रेउ डोंइती खोदेशो पा गेशो बाक्त। येरमीया ५:२४

24 मिनु खलापुकी अन्नमी ब्रीनीम। गरपुकी नक अडगुर शांबु नु तेलम ब्रीशा क्युप्नीम।

25 परमप्रभु यावेमी “गो इन कली लेस्वा माले, तोडले माले, सल्हा माले नु घांस खोइशशा ब्वाइब माले आन नेक्शो नेल्ल लेशशा गेनन्नी। मेको आं सोइशशो लडाइ पाइबपुकी बाक्तेक्म। गो मेको आन कली इन दातेमी सोइक्ताकडमी। योएल १:४

26 मिनु गो शुश जचा तशा रूनीनी। मिनु इन पब्रम छक लाक्चा डा गेय पाइब परमप्रभु यावे, इन परमप्रभु आ नें ठेयब सेल्चा माल्नीनी। मिनु आं मुरपुकी लेंशा गेनायो मुने मदोक्नीम। ब्यवस्था ८:१०

27 गो इस्राएली आन दातेमी बाक्शो बाक्नुड। गो परमप्रभु यावे, इन परमप्रभु नड। आं क्येडा लाक्शा, अर्को परमप्रभु मबाक्ब, दे गे तुइक्चा माल्नीनी। मिनु आं मुरपुकी लेंशा गेनायो मुने मदोक्नीम।

परमप्रभु आ सोक्त मोइक्तीके

प्रेरित २:१६-२१

28 मिनु नोले गो आं सोक्त मुर नेल्ल आन तार मोइक्नुड। मिनु इन तमी तौपुकीमी आं लोव्र पाइनीम। इन खाल्पापुकीमी डोमु ताइनीम। मिनु इन वोंइश आलपुकीमी आं कोंइशो ताइनीम। गन्ती ११:२९; यसैया ४४:३; इजीकीएल ३९:२९; तीतस ३:५-६

29 मेको नाक्ती गो वाइलीम वाइल आन तारी यो आं सोक्त मोइक्नुड।

30 गो सरीड नु रागीम चिन्ड कोंइनुडमी। हुश, मी नु कुन के थाम कोंइनुडमी। होसे ७:१

31 परमप्रभु यावे आ ठेयब हिंचा डा नाक्त जाक्या क्येडा डोंइती नां छिडछिड दुम्ब। मिनु तास्ला हुश दुम्ब” देशो बाक्ब। योएल २:२,१०,११; मत्ती २४:२९; प्रकाश ६:१२

32 मेना परमप्रभु यावे आ नें थोइब नेल्ल ब्रोंइचा ताइनीम। मारदे हना परमप्रभु यावेमी देशो खोदेशो पा सियोन डांडा नु यरूसलेममी परमप्रभु यावेमी ब्रेशोपुकी ब्रोंइचा ताइनीम। मिनु मेको प्रोंइशो आन दातेमी परमप्रभु यावे आ योत्रशो मुर बाक्नीम। रोमी १०:१३; ओबदिया १७

3

मुर आन कली निसाफ पशो

1 परमप्रभु यावेमी “मेको नाक्ती गो यहूदा नु यरूसलेम आस रिम्शो दुम्तीक नाक्ती लेशशा चाक्नुड। होसे ७:१

2 मिनु गो रागी रागी डा मुर नेल्ल आन कली खुप्शा, येहो-शाफात आ दिंममी चाक्नुडमी। मिनु मेकेर मेको आन कली निसाफ पाइनुड। मारदे हना मेकोपुकीमी आं मुर आन कली रागी रागी डा मुर आन दातेमी ब्रपाइक्तेक्म। मिनु आं रागी भाग भाग सेल्लेक्म।

3 मेकोपुकीमी आं मुर आन पर्बम फेन्टे ग्यारतेक्म। मिनु वोंइश आल लेयशा, तेल्लेम नु लाम्तेक्म। मीश आल आन कली लेयशा, अडगुर शांबु तूतेक्म।

4 टायर, सीदोन नु पलिस्ती आन रागी डा मुरपुकी आं कली मार पाइनीनी डा? मार, आं पशो आ पर्बम आं कली क्येक्क लेत्नीनी? गेपुकीमी आं कली क्येक्क लेत्ताक्नी हना, गो मेको रीब पा इन पिया तार मोइक्नुड।

5 मारदे हना गे आं सुन, चांदी नु थम रिम्शो थोत्रक नेल्ल इन दरवारम लाइक्तीनी।

6 मिनु गे यहूदा नु यरूसलेम डा मुर आन कली मेको आन रागी रे लाइशा, ग्रीस डा मुर आन कली लेयतीनी।

7 मुल गो मेको आन कली लेयशो रागी रे गुंडशा, चाक्नुडमी। मिनु गो इन श्येत गेशो लेंशा इन पिया तार मोइक्नुड।

8 मुल गो इन तमी तौ आन कली यहूदा डा मुर आन कली लेयनुडमी। मिनु मेकोपुकीमी मेको आन कली डोन साबा रागी डा मुर आन कली लेयनीम” दे परमप्रभु यावेमी देंशो बाक्ब।

9 मिनु परमप्रभुमी “एको लोव्र रागी रागी डा मुर आन दातेम नेंपतीन। लडाइ पचा कली ठीक दुमीन। लडाइ पाइब आन कली ब्रेत्तीन। बुक्तीक आ नेक्था जाक्चा माल्नीम।

10 गे इन फाली शोल्शा, तुप्शा तरवार सेलीन। मिनु इन गुये तुप्शा, तूतीक भाला सेलीन। मिनु गे हिंब मुरपुकीमी ‘गो बोल्यो लडाइ पाइब नकी’ देनीन। यसैया २:४

11 एर ओंथ बाक्शो रागी रागी डा मुर नेल्ल रीब पा जाक्कीन। गे नेल्ल मेकेर खुम्सीन। परमप्रभु यावे, इन बोल्यो लडाइ पाइब आन कली उइ यितीन।

12 मिनु रागी रागी डा मुर नेल्ल जोंब बोक्शा, खुम्सीशा येहो-शाफात आ दिंममी लमल। मारदे हना गो एर ओंथ डा रागी डा मुर नेल्ल आन कली निसाफ पाइनुड।

13 मिनु इन गुयेमी रिक्चा ठीक दुमीन। मारदे हना बाली नाली खुप्ची जाक्शो बाक्ब। मिनु ओव्रशा अडगुर खाक्कीन। मारदे हना कोल ब्रीशो बाक्त। गर ब्रीशा क्युप्शो बाक्नीम। मेको खोदेंशो पा आन मरिम्शो पशो शुश दुम्त। प्रकाश १४:१५; यसैया ६३:३,६; प्रकाश १४:१८

14 मिनु निसाफ पतीक दिंममी शुश मुर जाक्स डा जाक्स बाक्नीम। मारदे हना मेको दिंममी परमप्रभु यावे आ निसाफ पतीक नाक्ती जाक्चा चिक्शो बाक्ब।

15 नां नु तास्ला छिडछिड दुम्नीस। मिनु सोरुलपुकीमी आन छेडछेड मकोंइनीम” देंत। योएल २:१०; योएल ३:४

16 परमप्रभु यावेम सियोन रे ठेयब सेंदा पा लोत्र पाइब। यरूसलेम रे पा आ सेंदा नेंपाइक्ब। सरीड नु रागी खिंखि पाइनीस। तन्न परमप्रभु यावे आ मुर आन कली खुइशशा बाक्तीक नु इस्राएल डा मुर आन कली बोल्यो ब्रोंइशा बाक्तीक दरवार दुम्ब। आमोस १:२

परमप्रभु सियोनम बाक्ब

17 “गो, परमप्रभु यावे, इन परमप्रभु आं डांडा सियोनम बाक्नुड, दे गे तुइक्नीनी। मिनु यरूसलेम आं के दुम्ब। मिनु रागी रागी डा मुर मेको सहर डा लां रे पा मलाक्नीम। इजीकीएल ३४:३०

18 मेको नाक्ती डांडाम शुश अङ्गुर सिन्तीम। मिनु पहाडम दूध शुश बाक्ब। यहूदा डा खोला नेल्लेमी ब्वाक्कु शाइक्नीम। मिनु परमप्रभु यावे आ खिं रे पा ब्वाक्कु बुक्तीके शिक्तीम डा दिंम जिप्पाइक्ब। आमोस ९:१३; इजीकीएल ४७:१

19 मिनु यहूदा डा दोस मताइब मुर आन कली मरिम्शो पतीके नु हुश खाक्श पौक्तीके इजीप्त रागी मुर मबाक्तीके दुम्ब। मिनु एदोम चहिं कोक्त रागी दुम्ब।

20 तन्न यहूदा रागीम गेना हना यो मुर बाक्नीम। मिनु यरूसलेम नेल्ल पाला डा मुर आन कली दुम्ब। ओबदिया १०:-

21 गो मेको आन हुश खाक्श पौक्शो क्येक्क लेत्नुडमी। मिनु आन पाप मक्याम्नुड” दे परमप्रभुमी देंत। परमप्रभु यावे सियोनम बाक्ब। ब्यवस्था ३२:४३; इजीकीएल ४८:३५

परमप्रभु यावे आ लोत्र

Bible in Sunwar (NP:suz:Sunwar)

copyright © 2011 Wycliffe Bible Translators, Inc.

Language: Sunwar

Translation by: Wycliffe Bible Translators, Inc.

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

Printed book ISBN 9789937101646

The Bible without Deuterocanon

in Sunwar

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 18 Apr 2025 from source files
dated 29 Jan 2022

27cd6a1c-0244-5add-a4e8-b4f0e5104473